

Ngano nga ang Manluluwas adunay Simbahan?

1. Basaha ang mosunod nga mga pamahayag ug badlisi ang mga rason kon nganong ang Manluluwas adunay Simbahan.



Ang gipahiuli nga Simbahan ni Jesukristo naestablisar aron sa pagtudlo sa kahingpitan sa Iyang doktrina ug sa pagdumala gamit ang Iyang awtoridad sa pagkapari aron sa pagpahigayon sa mga ordinansa nga gikinahanglan aron makasulod sa gingharian sa Dios. Ang mga miyembro nga mobiya sa pagtambong sa Simbahan ug mosalig lamang sa indibidwal nga pagkaespirituhanon mobulag sa ilang kaugalingon gikan niining mahinungdanon nga mga butang sa ebanghelyo: ang gahom ug mga panalangin sa pagkapari, ang kahingpitan sa gipahiuli nga doktrina, ug ang mga kadasig ug mga kahigayonan sa paggamit niana nga doktrina. (Dallin H. Oaks, "Ang Panginahanglan alang sa usa ka Simbahan," *Liahona*, Nob. 2021, 25)



Human sa apostasiya ug pagkabungkag sa Simbahan nga Iyang giorganisar samtang dinhi sa yuta, ang Ginoo mitukod pag-usab sa Simbahan ni Jesukristo pinaagi ni Propeta Joseph Smith. Ang karaang katuyoan nagpabilin: nga, isangyaw ang maayong balita sa ebanghelyo ni Jesukristo ug ipahigayon ang mga ordinansa sa kaluwasan—sa laing pagkasulti, pagdala sa mga katawhan ngadto kang Kristo. Ug karon, pinaagi sa panabang niining gipahiuli nga Simbahan, ang saad sa katubsan makab-ot ra bisan sa mga espiritu sa mga patay nga gamay ra ang nasayran o wala masayud sa grasya sa Manluluwas sa dihang buhi pa sila.

(D. Todd Christofferson, "Nganong Anaa ang Simbahan," *Liahona*, Nob. 2015, 108)

Pagsulat og pagpamubo sa unsay imong nakat-onan gikan niini nga mga pamahayag kon nganong ang Manluluwas adunay Simbahan dinhi sa kalibotan.

2. Sa dihang ang Simbahan natukod niadtong Abril 1830, ang Basahon ni Mormon bag-o lang gimantala sa unang higayon. Diha sa Doktrina ug mga Pakigsaad 20:9–36, ang Ginoo mihatag og gibug-aton sa daghan nga mga kamatuoran nga gitudlo diha sa Basahon ni Mormon.

Tun-i ang mosunod nga mga hugpong sa mga bersikulo, mangita sa importante nga mga kamatuoran nga gitudlo sa Manluluwas mahitungod sa Iyang Kaugalingon ug sa Iyang doktrina. Ikonsiderar ang paggamit sa mga footnote alang niini nga mga kasulatan aron makatabang sa pagdiskobre sa importante nga impormasyon.

Doktrina ug mga Pakigsaad 20:8–15 (Ang Basahon ni Mormon ug ang tahas niini sa Pagpahiuli)

Doktrina ug mga Pakigsaad 20:17–25 (Ang plano sa kaluwasan)

Pagpili og duha o labaw pa sa duha sa mga kamatuoran nga imong gitun-an. Isulat kon nganong sa imong hunahuna importante nga kini nga mga kamatuoran mahatagan og gibug-aton samtang ang Simbahan gipahimutang.